

I. DISPOSICIÓNS XERAIS

XEFATURA DO ESTADO

7063 *Real decreto lei 8/2013, do 28 de xuño, de medidas urxentes contra a morosidade das administracións públicas e de apoio a entidades locais con problemas financeiros.*

I

A redución da morosidade das administracións públicas constitúe un elemento imprescindible para mellorar a competitividade da economía española, pois comporta reducir as necesidades de financiamento das empresas, o que lles permite aproveitar mellor as súas oportunidades de negocio e facilitar o crecemento económico.

Por iso, o informe da Comisión para a Reforma das Administracións Públicas contén algunhas propostas de reformas estruturais para erradicar a morosidade das administracións públicas. Deste xeito, o impulso da factura electrónica e a creación do Rexistro Contable permitirán axilizar os procedementos de pagamento ao provedor, dar certeza das facturas pendentes de pagamento existentes e mellorar os controis contables, para os efectos do cumprimento dos obxectivos de estabilidade orzamentaria e sustentabilidade financeira.

Ambas as ferramentas, a factura electrónica e o Rexistro Contable, contribuirán ao seguimento da morosidade a través dun indicador, o período medio de pagamentos, que visualizará o volume de débeda comercial das administracións. O control da débeda comercial elevarase a principio de sustentabilidade financeira, o que comporta a aplicación dos mecanismos de control da Lei orgánica 2/2012, do 27 de abril, de estabilidade orzamentaria e sustentabilidade financeira.

Para que as novas reformas estruturais neste ámbito resulten plenamente eficaces, cómpre aprobar algunhas medidas conxunturais, extraordinarias e urxentes que axuden as administracións a cumprir cos novos controis e cambios estruturais de funcionamento.

II

No título I establécese unha terceira e última fase do denominado mecanismo de financiamento para o pagamento a provedores que, como medida conxuntural e extraordinaria, axuda as administracións autonómicas e locais a reduciren a súa débeda comercial acumulada e a que poidan cumprir de forma inmediata coas novas regras a futuro vinculadas ao control da débeda comercial. Trátase de pór o contador da débeda comercial a cero con carácter previo á implantación da factura electrónica, do Rexistro Contable, do período medio de pagamentos e, en última instancia, dos controis da Lei orgánica 2/2012, do 27 de abril, de estabilidade orzamentaria e sustentabilidade financeira.

O Goberno aprobou o pasado ano o Real decreto lei 4/2012, do 24 de febreiro, polo que se determinan obrigas de información e procedementos necesarios para establecer un mecanismo de financiamento para o pagamento aos provedores das entidades locais, e que posteriormente se fixo extensible ás comunidades autónomas mediante un acordo do Consello de Política Fiscal e Financeira do 6 de marzo de 2012. Así mesmo, creouse o Fondo para o Financiamento dos Pagamentos a Provedores, mediante o Real decreto lei 7/2012, do 9 de marzo.

A citada normativa estableceu un mecanismo extraordinario de financiamento para o pagamento e a cancelación das débedas contraídas cos provedores das entidades locais e comunidades autónomas, ao mesmo tempo que se lles facilitaba ás administracións públicas endebedadas a formalización de préstamos a longo prazo, ben que coa exigencia

dunha condicionalidade fiscal e financeira que se concretou, entre outros elementos, no requisito de dispor de plans de axuste.

Ante os efectos favorables deste mecanismo, tanto sobre o produto interior bruto como sobre a creación e o mantemento de empregos directos, o Goberno, mediante a aprobación do Real decreto lei 4/2013, do 22 de febreiro, de medidas de apoio ao emprendedor e de estímulo do crecemento e da creación de emprego, puxo en marcha unha segunda fase do citado mecanismo ampliando tanto o seu ámbito obxectivo como subxectivo, permitindo por primeira vez a entrada nel das mancomunidades de municipios e as entidades locais do País Vasco e Navarra.

Mediante este real decreto leiponse en marcha unha última e terceira fase do citado mecanismo, na cal novamente se amplía tanto o ámbito subxectivo como obxectivo de aplicación e se establecen as especialidades do procedemento necesarias co obxectivo de axudar as comunidades autónomas e entidades locais a reduciren a súa débeda comercial acumulada e a que poidan estar en mellores condicións de cumprir coas novas reformas estruturais de control da débeda comercial.

Deste modo, por primeira vez poderán ser incluídas as obrigas adquiridas polas universidades públicas das comunidades autónomas, nos termos establecidos no real decreto lei, así como aquelas derivadas de indemnizacións por expropiacións recoñecidas en sentenza xudicial firme, con determinados límites, as transferencias das comunidades autónomas a entidades locais derivadas dalgunha das relacións xurídicas previstas no real decreto lei, ou as transferencias a institucións sen ánimo de lucro, entre outras.

Outra das principais novidades desta nova e última fase é a especial protección outorgada aos subcontratistas e ao resto de acredores dos provedores dos cales as administracións son debedoras. Para iso, facilítaselles información a estes acredores para que poidan coñecer en todo momento se os seus debedores van cobrar as súas débedas coas administracións a través deste mecanismo e en que momento. O acceso a esta información facilitaralles a súa toma de decisións sobre o cobramento das súas débedas pendentes con estes provedores das administracións, o que permitirá estender o efecto económico dinamizador ao resto da cadea de pagamentos.

Neste sentido, esta última fase permitirá saldar a débeda comercial acumulada por entidades locais e comunidades autónomas, contribuindo deste modo á erradicación da morosidade das administracións públicas.

O capítulo I regula o obxecto, define o concepto de provedor e regula o ámbito obxectivo de aplicación, entre outros elementos.

O capítulo II, de disposicións aplicables ás comunidades autónomas, establece o ámbito subxectivo de aplicación, a necesaria contabilización previa das obrigas obxecto desta nova fase, as especialidades procedementais relativas á subministración de información e ao pagamento de facturas, así como a necesaria revisión dos plans de axuste conforme as novas operacións de crédito concertadas.

O capítulo III, sobre disposicións aplicables ás entidades locais, regula o ámbito subxectivo de aplicación, a necesaria contabilización previa das obrigas obxecto desta nova fase, as especialidades relativas ao procedemento para a subministración de información e aos plans de axuste.

III

Os atrasos acumulados dos municipios no pagamento das súas obrigas, especialmente as que contraeron cos seus provedores, repercuten negativamente na súa liquidez e acaba xerando problemas estruturais de solvencia.

Como complemento ás medidas previstas no título I, para aliviar esta situación, o Goberno, a través deste real decreto lei, pon á disposición dos municipios que se encontren en situacións de especial dificultade un conxunto de medidas extraordinarias e urxentes de apoio á liquidez, de carácter temporal e voluntario, que lles permita facer fronte a estes problemas, sempre que cumpran coas debidas condicións fiscais e financeiras, tal e como exige a disposición adicional primeira da Lei orgánica 2/2012, do 27 de abril, de estabilidade orzamentaria e sustentabilidade financeira.

Entre estas medidas destacan as relativas ao ámbito da participación dos tributos do Estado, ás débedas xeradas cos acredores públicos, ao réxime de endebedamento o ao financiamento dos remanentes de tesouraría negativos.

En atención ao principio de eficiencia na asignación e utilización dos recursos públicos regulado no artigo sete da mencionada Lei orgánica 2/2012, do 27 de abril, as citadas medidas póñense á disposición só daqueles municipios que presenten maiores problemas de liquidez, para o cal se estableceron unha serie de criterios que determinarán a elixibilidade dos municipios. Será o Ministerio de Facenda e Administracións Públicas o que determine de entre as medidas solicitadas polo municipio elixible as que resultan de aplicación por se adaptaren mellor aos seus problemas concretos.

Por outra banda, sobre a base do cumprimento dun plan de axuste incluíuse un conxunto de condicións, tanto de carácter xeral como específico, en función das medidas que lles resulten de aplicación, que deberán cumprir os municipios aos cales se aplique o previsto neste real decreto lei. O Ministerio de Facenda e Administracións Públicas encargárase do seguimento e control dos mencionados plans de axuste e poderá solicitar e ter acceso a toda a información do municipio que xulgue relevante. O incumprimento dos compromisos contidos no plan de axuste comportará a anulación das medidas de apoio que se puidesen ter adoptado.

O capítulo I regula o obxecto e o ámbito subxectivo identificando os requisitos que deben cumprir os municipios que queiran solicitar as medidas extraordinarias de liquidez aquí reguladas. Así, ademais de estar ao día das súas obrigas de remisión económico-financeiras, será necesario que os citados municipios presenten un aforro neto e remanente de tesouraría para gastos xerais negativo durante os dous últimos anos, presenten débedas con acredores públicos pendentes de compensación que superen o 30 por cento dos seus ingresos non financeiros ou teñan unha débeda superior a un millón de euros co Fondo para o Financiamento dos Pagamentos a Provedores.

O capítulo II regula todas aquelas medidas que poden solicitar os municipios e entre as cales cabe destacar a concesión de anticipos do importe das entregas á conta de 2014, o fraccionamento das débedas coa Axencia Estatal de Administración Tributaria ou coa Seguridade Social por un prazo máximo de 10 anos ou a posibilidade, exclusivamente en 2013, de que os concellos poidan, a través de préstamos ou créditos bancarios, converter ou consolidar en operacións a longo prazo da débeda viva as súas operacións financeiras a curto prazo.

O capítulo III regula as condicións fiscais e financeiras asociadas ás medidas extraordinarias de apoio. Cabe diferenciar entre as condicións de carácter xeral aplicables en todo caso, entre as cales se encontran por exemplo a redución dos gastos de funcionamento, a obriga de financiar integramente os servizos públicos locais mediante taxas ou prezos públicos, ou as medidas destinadas á supresión das entidades dependentes ou vinculadas que se encontren en desequilibrio financeiro, e as condicións específicas unicamente aplicables no caso de que lle resulten de aplicación as medidas relativas á participación en tributos do Estado, ás débedas con acredores públicos ou ao réxime de endebedamento.

O capítulo IV regula o procedemento que inicie de oficio o Ministerio de Facenda e Administracións Públicas mediante a publicación dunha relación de municipios que cumpren os requisitos subxectivos. O mencionado ministerio fará o seguimento e control das condicións fiscais e financeiras e que, en caso de incumprimento, poderán dar lugar á anulación das medidas de apoio adoptadas.

IV

A disposición derradeira quinta modifica o texto refundido da Lei de contratos do sector público, aprobado polo Real decreto legislativo 3/2011, do 14 de novembro, co obxecto de avanzar no proceso de racionalización administrativa de acordo coas pautas marcadas pola Comisión de Reforma das Administracións Públicas, que considera prioritario impulsar e estender o sistema de contratación centralizada para o aprovisionamento do sector público.

Para poder acometer este inxente labor de forma eficaz e decidida e reforzar ao máximo as garantías do proceso, atribúenselle ao Ministerio de Facenda e Administracións Públicas as funcións, a través do órgano que se determine na súa estrutura orgánica, de órgano de contratación do sistema de contratación centralizada. Resulta requisito imprescindible e urxente a modificación do texto refundido da Lei de contratos para poder aprobar, a seguir, a modificación do real decreto de estrutura do departamento.

Entre as disposicións derradeiras restantes destaca a habilitación normativa ao Goberno e ao ministro de Facenda e Administracións Públicas para desenvolver o previsto no real decreto lei, a normativa que aplica con carácter supletorio á nova fase do mecanismo para o pagamento aos provedores das entidades locais e comunidades autónomas, que é toda a normativa anterior reguladora das fases unha e dúas do mecanismo, e a entrada en vigor.

A necesidade de atender as obrigas pendentes de pagamento acumuladas das administracións para reducir as necesidades de financiamento das empresas e atender as necesidades de liquidez das administracións aconsellan a adopción inmediata de medidas extraordinarias. No conxunto e en cada unha das medidas que se adoptan concorren, pola súa natureza e finalidade, as circunstancias de extraordinaria e urxente necesidade que exige o artigo 86 da Constitución española como presupostos habilitantes para a aprobación dun real decreto lei.

Na súa virtude, facendo uso da autorización contida no artigo 86 da Constitución española, por proposta do ministro de Facenda e Administracións Públicas, logo de deliberación do Consello de Ministros, na súa reunión do día 28 de xuño de 2013,

DISPOÑO:

TÍTULO I

Medidas extraordinarias de erradicación da morosidade

CAPÍTULO I

Disposicións xerais

Artigo 1. *Obxecto.*

O obxecto do título I do real decreto lei é a posta en marcha dunha nova fase do mecanismo de financiamento para o pagamento aos provedores das comunidades autónomas e entidades locais, regulado no Real decreto lei 4/2012, do 24 de febreiro, polo que se determinan as obrigas de información e os procedementos necesarios para establecer un mecanismo de financiamento para o pagamento aos provedores das entidades locais; no Real decreto lei 7/2012, do 9 de marzo, polo que se crea o Fondo para o Financiamento dos Pagamentos a Provedores; o Real decreto lei 4/2013, do 22 de febreiro, de medidas de apoio ao emprendedor e de estímulo do crecemento e da creación de emprego, así como o Acordo do Consello de Política Fiscal e Financeira, do 6 de marzo de 2012, polo que se fixan as liñas xerais dun mecanismo extraordinario de financiamento para o pagamento aos provedores das comunidades autónomas, que permita a cancelación das súas obrigas pendentes de pagamento cos seus provedores que fosen líquidas, vencidas e exhibibles con anterioridade ao 31 de maio de 2013.

Artigo 2. *Definición de provedor.*

Para efectos do previsto no título I deste real decreto lei, enténdese por provedor o titular dun dereito de crédito derivado das relacións xurídicas mencionadas no artigo 3, así como o cesionario a quen se lle transmitise o dereito de cobramento.

Artigo 3. *Ámbito obxectivo de aplicación.*

1. Poderanse incluír nesta nova fase as obrigas pendentes de pagamento cos provedores sempre que sexan vencidas, líquidas e exixibles, con anterioridade ao 31 de maio de 2013, estean contabilizadas de acordo co previsto nos artigos 11 e 15 e deriven dalgunha das seguintes relacións xurídicas:

a) Contratos de obras, concesión de obras públicas, xestión de servizos públicos, tamén na súa modalidade de concesión, incluíndo a subvención que se tiver pactado por conta das comunidades autónomas ou entidades locais, servizos, subministracións, de colaboración entre o sector público e o sector privado, e os contratos privados de creación e interpretación artística e literaria ou espectáculos, de acordo co previsto no texto refundido da Lei de contratos do sector público, aprobado polo Real decreto legislativo 3/2011, do 14 de novembro.

b) Contratos previstos na Lei 31/2007, do 30 de outubro, sobre procedementos de contratación nos sectores da auga, a enerxía, os transportes e os servizos postais.

c) Contratos de arrendamento sobre bens inmobles.

d) Subvencións outorgadas no marco da contratación pública, en concepto de bonificación das tarifas pagadas polos usuarios pola utilización dun ben ou servizo, na parte financiada pola comunidade autónoma ou entidade local.

e) Concertos subscritos en materia sanitaria, educativa e de servizos sociais, incluídos os subscritos cunha entidade pública que non se encontre incluída na definición de comunidade autónoma nin entidade local no ámbito dos seus respectivos subsectores.

f) Convenios de colaboración, sempre que o seu obxecto sexa a realización de actuacións determinadas a cambio dunha contraprestación.

g) Encomendas de xestión en que a entidade encomendada teña atribuída a condición de medio propio e servizo técnico da Administración e non se encontre incluída na definición de comunidade autónoma nin entidade local no ámbito dos seus respectivos subsectores.

h) Concesións administrativas.

i) Indemnizacións por expropiacións recoñecidas por resolución xudicial firme polo concepto xa liquidado xudicialmente, sempre que a Administración sexa a beneficiaria da expropiación.

j) Transferencias das comunidades autónomas ou das entidades locais a asociacións e institucións sen fins de lucro e con fins sociais que desenvolvan as súas actividades principalmente no ámbito dos colectivos a que aluden os artigos 39, 49 e 50 da Constitución española. Estas obrigas de pagamento serán ata o límite das obrigas pendentes de pagamento por parte da comunidade autónoma ou a entidade local, en 31 decembro de 2012, ás citadas entidades.

k) Subvencións para a realización de actividades de investigación, desenvolvemento e innovación das entidades inscritas no Rexistro de Centros Tecnolóxicos e Centros de Apoio á Innovación do Ministerio de Economía e Competitividade outorgadas polas comunidades autónomas.

2. Para o caso das comunidades autónomas, poderanse incluír tamén nesta nova fase as obrigas pendentes de pagamento previstas nos artigos 9 e 10.

3. Quedan excluídas as obrigas de pagamento contraídas entre entidades que teñan a consideración de administracións públicas no ámbito da contabilidade nacional, coa excepción das que deriven das relacións xurídicas referidas ás encomendas de xestión, os concertos en materia sanitaria, educativa e de servizos sociais e as transferencias previstas no ordinal primeiro.

Artigo 4. *Información aos acredores dos provedores incluídos nesta nova fase do mecanismo.*

1. Os acredores dos provedores a que se refire o artigo 2, incluídos nesta nova fase do mecanismo, que, como obrigados tributarios, en cumprimento da normativa tributaria, presentasen a declaración anual informativa sobre as operacións con terceiras persoas ou as

declaracións informativas sobre operacións incluídas nos libros rexistro, relativas á información correspondente aos exercicios 2011 e 2012, poderán acceder e coñecer, a través da páxina web da Axencia Estatal de Administración Tributaria, a seguinte información:

a) Se as persoas ou entidades consignadas polo acredor nas citadas declaracións están incluídas nas relacións certificadas enviadas pola comunidade autónoma ou a entidade local ao Ministerio de Facenda e Administracións Públicas ou nas certificacións individuais que fosen aceptadas pola comunidade autónoma ou a entidade local.

b) Se as persoas ou entidades consignadas polo acredor nas citadas declaracións están incluídas entre os provedores que aceptaron o pagamento da súa débeda a través deste mecanismo.

c) A data en que sexa remitida a relación definitiva de facturas para pagar ao axente de pagamentos do Fondo para o Financiamento dos Pagamentos a Provedores.

2. Con respecto á normativa sobre protección de datos de carácter persoal, a información a que teña acceso o acredor, de acordo co previsto neste artigo, poderá ser utilizada co obxectivo de facilitar o cobramento dos seus créditos pendentes de pagamento por parte destes provedores. Para estes efectos, os mencionados provedores poderanlle comunicar, antes do correspondente pagamento, ao axente de pagamentos do Fondo para o Financiamento dos Pagamentos a Provedores os embargos que, de ser o caso, se acordasen.

Artigo 5. Cancelación de obrigas pendentes de pagamento con financiamento afectado.

As obrigas pendentes de pagamento que fosen aboadas a través desta nova fase do mecanismo e contasen con financiamento afectado, ao recibirse o seu ingreso, esta entenderase automaticamente afectada ao Fondo para o Financiamento dos Pagamentos a Provedores e deberá destinarse á amortización anticipada da operación de endebedamento ou, de ser o caso, á cancelación da débeda da comunidade autónoma ou entidade local co citado fondo.

Esta previsión non será de aplicación ás obrigas que contén con financiamento procedente de fondos estruturais da Unión Europea.

Artigo 6. Efectos do aboamento das obrigas pendentes de pagamento.

O aboamento a favor do provedor comporta a extinción da débeda contraída pola comunidade autónoma ou entidade local, segundo corresponda, co provedor, polo principal, os xuros, as custas xudiciais e calquera outro gasto accesorio.

Artigo 7. Axente de pagamentos.

Corresponderá ao Instituto de Crédito Oficial, como axente de pagamentos do Fondo para o Financiamento dos Pagamentos a Provedores, a administración e xestión das operacións que se concerten ao abeiro do título I deste real decreto lei, nos termos previstos no Real decreto lei 7/2012, do 9 de marzo, polo que se crea o Fondo para o Financiamento dos Pagamentos a Provedores.

CAPÍTULO II

Disposicións aplicables a comunidades autónomas

Artigo 8. Ámbito de aplicación subxectivo.

Poderán participar nesta nova fase do mecanismo a que se refire o Acordo do Consello de Política Fiscal e Financeira, do 6 de marzo de 2012, polo que se fixan as liñas xerais dun mecanismo extraordinario de financiamento para o pagamento aos provedores das comunidades autónomas, as comunidades autónomas que así o soliciten.

Para estes efectos, entenderase por comunidade autónoma a Administración da comunidade autónoma e o resto de entidades, organismos e entes dependentes daquela incluídos no sector administracións públicas, subsector comunidades autónomas, de acordo coa definición e delimitación do Sistema Europeo de Contas Nacionais e Rexionais aprobado polo Regulamento (CE) 2223/1996 do Consello, do 25 de xuño de 1996.

Artigo 9. *Transferencias das comunidades autónomas.*

Poderanse incluír nesta nova fase as obrigas pendentes de pagamento cos provedores sempre que sexan vencidas, líquidas e exixibles con anterioridade ao 31 de maio de 2013 e estean contabilizadas de acordo co previsto no artigo 11.

Ademais das relacións xurídicas previstas no artigo 3, incluíranse as transferencias das comunidades autónomas a entidades locais ata o límite das obrigas pendentes de pagamento por parte da comunidade autónoma en 31 de decembro de 2012, ás citadas entidades, e sempre que a entidade local teña obrigas pendentes de pagamento que debería ter incluído nesta nova fase do mecanismo.

Artigo 10. *Universidades.*

1. Poderanse incluír nesta nova fase as obrigas pendentes de pagamento das universidades públicas cos seus provedores sempre que sexan vencidas, líquidas e exixibles, con anterioridade ao 31 de maio de 2013, estean contabilizadas de acordo co previsto no artigo 11 e deriven dalgunha das relacións xurídicas previstas no artigo 3 ata o límite das obrigas pendentes de pagamento por parte da comunidade autónoma á universidade en 31 de decembro de 2012.

2. Para superar o límite previsto no punto anterior, será necesario que a comunidade autónoma solicite o consentimento da universidade e acorde con ela un plan de axuste con medidas específicas e cuantificadas cun calendario de aplicación que garantan o reembolso das cantidades derivadas das operacións de endebedamento concertadas pola comunidade autónoma. Este plan de axuste formará parte, pola súa vez, do plan de axuste que a comunidade autónoma remita ao Ministerio de Facenda e Administracións Públicas.

Artigo 11. *Contabilización das obrigas.*

1. Para os efectos do disposto no artigo 3, entenderase que as obrigas pendentes de pagamento se encontran debidamente contabilizadas cando, con anterioridade á entrada en vigor do real decreto lei, se dean as seguintes circunstancias:

a) As obrigas anteriores ao exercicio 2012 terán que estar incluídas na conta xeral da comunidade autónoma do exercicio 2011 e anteriores, ou nas contas anuais aprobadas correspondentes a tales exercicios no suposto de que se trate dunha entidade que non forme parte dela.

b) As obrigas correspondentes a 2012 deberán estar contabilizadas nos datos de execución orzamentaria relativos ao peche provisional deste exercicio, comunicados á Intervención Xeral da Administración do Estado con anterioridade á entrada en vigor deste real decreto lei, no marco das obrigas de remisión de información impostas pola Lei orgánica 2/2012, do 27 de abril, de estabilidade orzamentaria e sustentabilidade financeira, e pola Orde HAP/2105/2012, do 1 de outubro, pola que se desenvolven as obrigas de subministración de información previstas na Lei orgánica 2/2012, do 27 de abril, de estabilidade orzamentaria e sustentabilidade.

c) As obrigas de 2013 terán que estar contabilizadas con anterioridade á entrada en vigor deste real decreto lei e comunicadas nos datos mensuais de execución orzamentaria remitidos ao Ministerio de Facenda e Administracións Públicas no mes inmediato seguinte, de acordo coas obrigas de remisión de información previstas na Lei orgánica 2/2012, do 27 de abril, e na Orde HAP/2105/2012, do 1 de outubro.

2. As operacións deberán quedar aplicadas ao orzamento antes do pagamento. No caso das obrigas recollidas na letra c) do punto anterior, cando a dita aplicación ao orzamento supoña un aumento dos créditos orzamentarios, esta circunstancia deberase incluír no plan de axuste con indicación da modificación orzamentaria instrumentada, sen que para estes efectos sexa posible a xeración de crédito con cargo a unha operación financeira.

Artigo 12. *Especialidades do procedemento aplicable para a subministración de información por parte das comunidades autónomas e o pagamento de facturas.*

1. Tras a entrada en vigor deste real decreto lei, para atender as obrigas pendentes de pagamento referidas aos concertos subscritos en materia sanitaria, educativa e de servizos sociais, os convenios de colaboración, así como as transferencias a asociacións e institucións sen fins de lucro e con fins sociais; as subvencións para a realización de actividades de investigación, desenvolvemento e innovación e as transferencias das comunidades autónomas a entidades locais e ás universidades, nos termos previstos nos artigos 3.1.e), 3.1.f), 3.1.j), 3.1.k), 9 e 10, respectivamente, iniciárase o seguinte procedemento:

a) Ata o 19 de xullo de 2013, a comunidade autónoma deberá enviar, por vía telemática e con sinatura electrónica, ao Ministerio de Facenda e Administracións Públicas unha relación certificada polo interventor xeral da comunidade autónoma na cal figuren as obrigas mencionadas no artigo 3.

b) Ata o 24 de xullo de 2013, o Ministerio de Facenda e Administracións Públicas realizará comprobacións sobre a relación remitida polas comunidades autónomas e emendaranse os erros detectados.

c) Desde o 25 de xullo ata o 6 de setembro de 2013, os provedores poderán consultar esta relación e aceptar, de ser o caso, o pagamento da débeda a través deste mecanismo.

d) Aqueles provedores non incluídos na relación inicial poderán solicitar, ata o 6 de setembro de 2013, á comunidade autónoma debedora a emisión dun certificado individual de recoñecemento da existencia de obrigas pendentes de pagamento, que reúnan os requisitos previstos no artigo 3, por conta da comunidade autónoma. A solicitude deste certificado implica a aceptación do provedor nos termos sinalados na alínea anterior.

e) O certificado individual será expedido polo interventor xeral da comunidade autónoma no prazo de dez días hábiles desde a presentación da solicitude; para estes efectos considerárase inhábil o mes de agosto. No caso de que non se contestase a solicitude en prazo, entenderase rexeitada.

f) Ata o 20 de setembro de 2013, o interventor xeral da comunidade autónoma comunicará ao Ministerio de Facenda e Administracións Públicas, por vía telemática e con sinatura electrónica, unha relación completa certificada das facturas que, cumprindo os requisitos previstos neste título I do real decreto lei, fosen aceptadas polos provedores.

g) A comunidade autónoma permitiralles aos provedores consultar a súa inclusión nesta información actualizada e, en caso de estaren incluídos, poderán coñecer a información que os afecte con respecto á normativa de protección de datos de carácter persoal.

2. Mediante acordo da Comisión Delegada do Goberno para Asuntos Económicos, de acordo coa situación financeira das comunidades autónomas, porase en funcionamento esta nova fase do mecanismo para atender o resto das obrigas pendentes de pagamento incluídas no ámbito obxectivo de aplicación deste título I do real decreto lei, coa excepción das obrigas xa atendidas, indicando os prazos para iniciar o procedemento descrito.

Artigo 13. *Revisión do plan de axuste.*

As comunidades autónomas deberán remitir ao Ministerio de Facenda e Administracións Públicas un plan de axuste e este realizará unha valoración no prazo dun

mes desde a súa presentación. No caso das comunidades autónomas que xa contén un plan de axuste previamente aprobado con ocasión da execución de calquera das anteriores fases do mecanismo de pagamento a provedores ou do fondo de liquidez autonómico, deberán enviar unha revisión do que xa teñan, que tamén será valorada polo mencionado ministerio.

CAPÍTULO III

Disposicións aplicables a entidades locais

Artigo 14. *Ámbito de aplicación subxectivo.*

1. Poderá serlles de aplicación esta nova fase do mecanismo de pagamento a provedores ás seguintes entidades locais:

- a) Ás entidades locais mencionadas no artigo 3.1 da Lei 7/1985, do 2 de abril, reguladora das bases do réxime local.
- b) Ás mancomunidades de municipios e respecto das cales non se iniciase un procedemento de disolución.
- c) Aos consorcios cuxa composición sexa integramente local e respecto dos cales non se iniciase un procedemento de disolución.
- d) Ás entidades locais de País Vasco e Navarra que estean incluídas no modelo de participación en tributos do Estado, logo de subscripción do correspondente convenio entre a Administración xeral do Estado e as deputacións forais do País Vasco ou da Comunidade Foral de Navarra, segundo corresponda.

2. Para estes efectos, entenderase por entidade local a Administración da entidade local e o resto de entidades, organismos e entes dependentes daquela incluídos no sector administracións públicas, subsector corporacións locais, de acordo coa definición e delimitación do Sistema Europeo de Contas Nacionais e Rexionais, aprobado polo Regulamento (CE) 2223/1996 do Consello, do 25 de xuño de 1996.

3. En todo caso, as entidades locais ás cales se lles aplicasen as fases anteriores deste mecanismo deberán, con data límite do 3 de xullo de 2013, estar ao día das súas obrigas de pagamento co Fondo para o Financiamento dos Pagamentos a Provedores para poderen incluír as súas facturas nesta nova fase.

Artigo 15. *Contabilización das obrigas.*

Para os efectos do disposto no artigo 3, entenderase que as obrigas pendentes de pagamento se encontran debidamente contabilizadas cando, con anterioridade á entrada en vigor do real decreto lei, se dean as seguintes circunstancias:

1. As obrigas anteriores ao exercicio 2013 terán que se ter contabilizado e recoñecido con cargo aos orzamentos da respectiva entidade local correspondentes a exercicios anteriores a 2013.
2. As obrigas correspondentes a 2013 terán que estar contabilizadas con anterioridade ao 31 de maio de 2013 e deberán quedar aplicadas ao orzamento do dito exercicio antes da remisión da relación certificada a que se refire o artigo 16.5 e, en todo caso, antes do pagamento. O interventor da entidade local deberá comunicar ao Ministerio de Facenda e Administracións Públicas, por vía telemática e con sinatura electrónica, o cumprimento desta obriga no ámbito da xestión orzamentaria.

Artigo 16. *Especialidades do procedemento aplicable para a subministración de información por parte das entidades locais e o pagamento de facturas.*

1. Ata o 19 de xullo de 2013, o interventor da entidade local deberá enviar, por vía telemática e con sinatura electrónica, ao Ministerio de Facenda e Administracións

Públicas unha relación certificada na cal figuren as obrigas mencionadas no artigo 3, da que aquel estará obrigado a informar o pleno da respectiva corporación. Na dita relación especificaranse a aplicación orzamentaria e o tipo de relación xurídica, incluíndo, de ser o caso, a modalidade contractual, da cal deriva a obriga incluída na mencionada relación.

2. Desde o 25 de xullo de 2013 ata o 6 de setembro de 2013, os provedores poderán consultar aquela relación e aceptar, de ser o caso, o pagamento da débeda a través deste mecanismo.

3. Aqueles provedores non incluídos na relación inicial poderán solicitar, ata o 6 de setembro de 2013, á entidade local debedora a emisión dun certificado individual de recoñecemento da existencia de obrigas pendentes de pagamento, que reúnan os requisitos previstos no artigo 3, por conta da entidade local. A solicitude deste certificado implica a aceptación do provedor nos termos sinalados no punto anterior.

4. O certificado individual será expedido polo interventor da entidade local no prazo de dez días hábiles desde a presentación da solicitude; para estes efectos considerárase inhábil o mes de agosto. No caso de que non se contestase a solicitude en prazo, entenderase rexeitada.

5. Ata o 20 de setembro de 2013, o interventor comunicará ao Ministerio de Facenda e Administracións Públicas, por vía telemática e con sinatura electrónica, unha relación completa certificada das facturas que, cumprindo os requisitos previstos neste título I do real decreto lei, fosen aceptadas polos provedores, incluíndo as solicitudes aceptadas de certificados individuais.

6. As entidades locais permitiránlles aos provedores consultar a súa inclusión na información actualizada, con respecto á normativa de protección de datos de carácter persoal.

7. Os presidentes das entidades locais deberán ditar as instrucións necesarias para garantir a atención aos provedores nas súas solicitudes, na emisión dos certificados individuais e no acceso á información remitida.

Artigo 17. Especialidades do procedemento aplicable para a subministración de información por parte das mancomunidades e consorcios integramente locais e o pagamento de facturas.

1. Ata a data indicada no artigo 16.1, as mancomunidades e os consorcios deberán enviar ao Ministerio de Facenda e Administracións Públicas copia fidedigna dos estatutos polos cales se rexen e especificar a porcentaxe de participación, en 31 de decembro de 2012, de cada unha das entidades locais que as integran e que conste naqueles. Os mencionados estatutos deberán ter sido aprobados polos plenos dos ditos concellos. A falta de remisión desta documentación impedirá iniciar o procedemento previsto na presente norma.

2. No caso de que a mancomunidade ou o consorcio non estean incluídos na base de datos xeral de entidades locais e no Inventario de entes do sector público local dependente do Ministerio de Facenda e Administracións Públicas, deberán solicitar a súa inclusión no prazo previsto no parágrafo anterior, así como a remisión da documentación citada nel.

3. En relación coas mancomunidades ou consorcios que presentaron a información citada nos puntos 2 e 3 anteriores con motivo da aplicación do Real decreto lei 4/2013, do 22 de febreiro, o Ministerio de Facenda e Administracións Públicas poderá limitarse a requirir a confirmación da vixencia daquela información.

4. Non se poderá materializar o dereito de cobramento dos contratistas, no marco deste mecanismo de financiamento, no caso de que a mancomunidade ou consorcio de debedores non desen cumprimento ás obrigas formais establecidas nos puntos anteriores.

5. As referencias que se fan no artigo 16 ao pleno da Corporación Local deberán entenderse realizadas ao órgano de goberno establecido polos estatutos polos cales se rexen as mancomunidades e os consorcios e que fosen aprobados polos plenos das entidades locais que os integren.

6. No caso das mancomunidades ou consorcios debedores, a garantía para o pagamento das súas obrigas derivadas das operacións de endebedamento que subscriban co Fondo para o Financiamento dos Pagamentos a Provedores executarase mediante retencións na participación en tributos do Estado dos municipios integrantes das mancomunidades ou consorcios, en proporción ás súas respectivas cotas de participación nas citadas entidades en 31 de decembro de 2012. Este criterio será de aplicación no caso de que as entidades locais non concerten as operacións de endebedamento citadas para efectos da execución daquelas retencións.

Artigo 18. *Especialidades do plan de axuste.*

1. O plan de axuste que presente a entidade local deberá cumprir co seguinte:

a. A remisión ao Ministerio de Facenda e Administracións Públicas da certificación prevista no artigo 16 implicará para a entidade local a elaboración dun plan de axuste se a entidade local pretende formalizar unha operación de endebedamento para financiar as obrigas de pagamento aboadas con cargo á terceira fase do mecanismo regulada neste real decreto lei. O dito plan presentarase con informe do interventor ou órgano de control interno, para a súa aprobación polo pleno da corporación local, e deberá remitirse ao órgano competente do Ministerio de Facenda e Administracións Públicas ata o 27 de setembro de 2013, por vía telemática e con sinatura electrónica.

b. O órgano competente do Ministerio de Facenda e Administracións Públicas realizará unha valoración do plan presentado; o prazo para comunicar o resultado da dita valoración finalizará o día 31 de outubro de 2013. Transcorrido o dito prazo sen que se comunique o resultado da citada valoración, esta considerárase desfavorable.

c. No caso das entidades locais do País Vasco e de Navarra observarase o que dispoñan os correspondentes convenios que, de ser o caso, se subscriban entre a Administración xeral do Estado e as deputacións forais do País Vasco ou a Comunidade Foral de Navarra, segundo corresponda.

2. As entidades locais que xa contasen cun plan de axuste previamente aprobado con ocasión da execución de calquera das anteriores fases do mecanismo de pagamento a provedores de entidades locais e que queiran formalizar unha nova operación de endebedamento deberán enviar unha revisión do seu plan de axuste aprobada polo seu pleno antes da data límite prevista no artigo 18.1.a).

As medidas e proxeccións incluídas na mencionada revisión do plan de axuste deberán incorporarse tamén á información trimestral adicional ou ao informe de execución do plan de axuste, segundo corresponda, que, en cumprimento do artigo 10 da Orde HAP 2105/2012, do 1 de outubro, deba remitirse inmediatamente despois da data indicada no artigo 18.1.a).

3. Cando as contías das obrigas pendentes de pagamento incluídas neste procedemento excedan o 70 por cento do importe das operacións de préstamo concertadas en aplicación dos reais decretos leis 4/2012, do 24 de febreiro, e 4/2013, do 22 de febreiro, o Ministerio de Facenda e Administracións Públicas poderalle impor á entidade local a adopción de medidas adicionais ás previstas no plan de axuste, que deberán ser aprobadas polo pleno da corporación local ou órgano correspondente.

De non se aprobaren tales medidas, entenderase valorada desfavorablemente a citada revisión e a entidade local afectada deberá amortizar a operación de préstamo que, de ser o caso, tiver formalizado en aplicación desta norma. Se non se produce a dita amortización, serán de aplicación as retencións que correspondan na participación en tributos do Estado da entidade local.

4. As entidades locais que non conten no seu orzamento cun fondo de contingencia deberán crealo no seu orzamento correspondente a 2014 e sucesivos cunha dotación mínima do 0,5 por cento do importe dos seus gastos non financeiros, e así o farán constar no seu plan de axuste.

Artigo 19. *Ordenación de pagamentos.*

As obrigas pendentes de pagamento que se inclúan no mecanismo de financiamento do pagamento a provedores regulado no título I deste real decreto lei consideraranse excluídas da aplicación do artigo 187 do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo, polo que as entidades locais poderán expedir ordes de pagamento de obrigas contraídas con posterioridade a aquelas mesmo cando non se materializasen as transferencias aos provedores que aceptasen a aplicación deste mecanismo de financiamento.

TÍTULO II

Medidas extraordinarias de liquidez para municipios con problemas financeiros

CAPÍTULO I

Disposicións xerais

Artigo 20. *Obxecto.*

O obxecto do título II do real decreto lei é regular medidas extraordinarias, de carácter temporal e voluntario, de apoio á liquidez dos municipios que reúnan os requisitos e as condicións previstos neste título II.

Artigo 21. *Ámbito subxectivo.*

Poderán solicitar a aplicación das medidas previstas no título II deste real decreto lei os municipios que, con data do 2 de xullo de 2013, cumprisen coas súas obrigas de remisión de información económico-financeira, de acordo coa normativa reguladora das facendas locais e a de estabilidade orzamentaria e sustentabilidade financeira e, ademais, se encontren nalgunha das seguintes situacións:

a) Que presenten aforro neto e remanente de tesouraría para gastos xerais negativos, en termos consolidados, nos dous últimos anos.

Para os efectos anteriores, entenderase por aforro neto a diferenza entre os dereitos liquidados por ingresos correntes, incluídos nos capítulos 1 ao 5 do orzamento, e as obrigas recoñecidas por gastos correntes, incluídos nos capítulos 1 ao 4 do orzamento, minorada na contía das obrigas recoñecidas polo capítulo 9 do estado de gastos. Considerarase o remanente de tesouraría para gastos xerais que tiver sido aprobado coa liquidación do orzamento xeral do municipio, minorado no importe das obrigas pendentes de aplicar a orzamento e rexistradas contablemente en 31 de decembro de 2012 na conta de «Acredores por operacións pendentes de aplicar a orzamento», nos termos establecidos na normativa contable e orzamentaria que resulte de aplicación.

b) Que presenten débedas con acredores públicos, pendentes de compensación mediante retencións da participación en tributos do Estado, superiores ao 30 por cento dos seus respectivos ingresos non financeiros, considerando a última liquidación dispoñible do orzamento xeral do municipio.

As débedas a que se refire esta alínea son as que están suxeitas ao citado réxime de retención en aplicación da disposición adicional cuarta do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo, e do artigo 108 da Lei 17/2012, do 27 de decembro, de orzamentos xerais do Estado para o ano 2013.

c) Que contraesen unha débeda por importe superior a un millón de euros por préstamos concertados co Fondo para o Financiamento dos Pagamentos a Provedores e non cumprisen coa súa obriga de pagar as cotas trimestrais de préstamos correspondentes a períodos anteriores á entrada en vigor deste real decreto lei.

d) Que, tendo presentado remanente negativo de tesouraría para gastos xerais, en termos consolidados, nos anos 2009, 2010 e 2011, e tendo unha débeda por operacións

de préstamo concertadas co Fondo para o Financiamento dos Pagamentos a Provedores, en virtude do Real decreto lei 4/2012, do 24 de febreiro, por importe superior a un millón de euros, se encontren, ademais, nalgunha destas situacións:

1.º Presenten remanente negativo de tesouraría para gastos xerais en 2012 con maior importe negativo que o correspondente a 2009.

2.º Presenten remanente de tesouraría para gastos xerais en 2012, descontado o efecto do mecanismo de pagamentos a provedores do Real decreto lei 4/2012, do 24 de febreiro, con signo negativo, e ademais teñan, na data de entrada en vigor desta norma, débedas coa Axencia Estatal de Administración Tributaria o coa Seguridade Social que se estean compensando mediante retencións na participación en tributos do Estado.

CAPÍTULO II

Medidas extraordinarias

Artigo 22. *Medidas de apoio no ámbito da participación en tributos do Estado.*

Os municipios que cumpran co previsto no artigo 21 poderán solicitar que se lles aplique algunha ou varias das seguintes medidas de apoio á liquidez no ámbito da participación en tributos do Estado:

a. Concesión, no primeiro trimestre de 2014, de anticipos con cargo á súa participación en tributos do Estado por un importe máximo da contía equivalente ás entregas á conta de 2014 polo dito concepto. Estes anticipos serán reintegrados mensualmente de maneira lineal durante un período máximo de tres anos desde o inicio do exercicio da súa concesión.

Cando o período de reintegro acordado para os anticipos sinalados no parágrafo anterior sexa superior ao exercicio corrente da súa concesión, estes anticipos devindarán en favor do Estado o tipo de xuro legal do diñeiro polo período que transcorra desde a finalización do citado exercicio corrente ata o momento dos seus sucesivos reintegros mensuais. Os ditos xuros aboaranse anualmente.

b. Concesión dunha ampliación do período de reintegro dos saldos que resultaron por conta dos respectivos municipios nas liquidacións definitivas da participación en tributos do Estado dos anos 2008 e 2009.

Esta ampliación só poderá resultar de aplicación a aqueles municipios que non quedaron incluídos no réxime de fraccionamento ampliado, regulado na disposición derradeira décima da Lei 2/2012, do 29 de xuño, de orzamentos xerais do Estado para o ano 2012.

En ningún caso a ampliación do período de reintegro poderá supor que os municipios beneficiados cancelen a súa débeda coa Facenda do Estado con posterioridade ao momento en que a terían cancelado de se ter aplicado o fraccionamento ampliado de acordo coa citada disposición derradeira décima da Lei 2/2012, do 29 de xuño.

c. No caso de se estar aplicando retencións na participación en tributos do Estado para compensar débedas dos municipios coa Seguridade Social e coa Facenda Pública estatal, que se aplique unha redución da porcentaxe de retención que se estiver aplicando co límite do 25 por cento establecido no artigo 108.Tres da Lei 17/2012, do 27 de decembro, de orzamentos xerais do Estado para o ano 2013, e por un período superior ao do mesmo exercicio económico en que se aprobe a mencionada redución sen que poida exceder os tres exercicios orzamentarios seguintes.

d. No caso de se estar aplicando retencións na participación en tributos do Estado para compensar débedas dos municipios coa Seguridade Social e coa Facenda Pública estatal, que se aplique a suspensión da súa aplicación por un período que non poderá superar o mesmo exercicio orzamentario en que se acorde a dita suspensión. Esta suspensión non dará lugar á aplicación de xuros financeiros nin de demora durante o período de duración desta medida.

Artigo 23. Medidas de apoio en relación coas débedas dos municipios con acredores públicos.

1. Os municipios que cumpran co previsto no artigo 21.b poderán solicitar que as súas débedas, ou as das súas entidades de dereito público dependentes, coa Seguridade Social e coa Facenda Pública estatal, que se encontren en período executivo con anterioridade á entrada en vigor deste real decreto lei, se fraccionen a dez anos, salvo que o municipio solicite un prazo inferior; así, resultará de aplicación o tipo de xuro legal do diñeiro.

2. O previsto no punto anterior aplicarase de conformidade coa Lei 58/2003, do 17 de decembro, xeral tributaria; co Real decreto legislativo 1/1994, do 20 de xuño, polo que se aproba o texto refundido da Lei xeral da seguridade social, ou coa Lei 47/2003, do 26 de novembro, xeral orzamentaria, segundo corresponda.

3. Se o concello incumpre os termos do fraccionamento, para a cancelación das débedas ao seu cargo con acredores públicos serán de aplicación as porcentaxes máximas de retención que, de acordo coa disposición adicional cuarta do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo, se establezan na lei de orzamentos xerais do Estado de cada ano sen que se poidan reducir as ditas porcentaxes en ningún caso.

Artigo 24. Medidas de apoio en relación co réxime de endebedamento.

Os municipios que cumpran co previsto no artigo 21:

a) Poderán solicitar, exclusivamente para 2013, ser autorizados para que as operacións financeiras a curto prazo que tivesen concertado antes da entrada en vigor deste real decreto lei se convertan ou se consoliden en operacións a longo prazo da débeda viva. A conversión ou consolidación anterior poderase concertar mediante unha operación única, instrumentada a través de préstamos ou créditos bancarios. O importe susceptible de consolidación non poderá superar o límite establecido, considerando o orzamento xeral do municipio, no artigo 51 do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo.

b) Poderán solicitar que non se lles computen nos límites de endebedamento a que se refiren os artigos 51 e 53 do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo, as operacións de crédito destinadas a dar cobertura á falta de pagamento correspondente a subvencións concedidas pola Unión Europea ou polas comunidades autónomas, durante o tempo que transcorra desde a concesión das citadas subvencións ata o seu cobramento correspondente.

Artigo 25. Financiamento do remanente negativo de tesouraría para gastos xerais.

Os municipios que cumpran co previsto no artigo 21 poderán solicitar ser autorizados para financiar a longo prazo o remanente negativo de tesouraría para gastos xerais do ano 2012, así como as obrigas pendentes de aplicar a orzamento e rexistradas contablemente en 31 de decembro de 2012 na conta de «Acredores por operacións pendentes de aplicar a orzamento» conforme a normativa contable e orzamentaria que resulta de aplicación, mediante a concertación dunha operación de crédito a longo prazo, sen suxeición aos límites do artigo 177.5 do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo.

Do importe que sexan autorizados a financiar, de acordo co previsto no parágrafo anterior, minorarase o que se financie con posterioridade á entrada en vigor deste real decreto lei con cargo a novas fases do mecanismo para o financiamento dos pagamentos a provedores.

CAPÍTULO III

Condicións a que se somete o acceso ás medidas extraordinarias de apoio á liquidez de municipios

Artigo 26. *Condicións aplicables con carácter xeral aos municipios.*

Os municipios aos cales se lles aplique calquera das medidas contidas no capítulo anterior deste título II deberán remitir ao Ministerio de Facenda e Administracións Públicas un plan de axuste ou unha revisión do que xa teñan, incorporando, polo menos, as seguintes condicións, que deberán cumprir durante o período en que se apliquen as medidas:

a) Reducir, polo menos, un 5% os seus gastos de funcionamento correspondentes aos capítulos 1 e 2 do estado de gastos no primeiro exercicio orzamentario en que resulten de aplicación as citadas medidas e non aumentalos nos dous exercicios seguintes. A partir do cuarto exercicio orzamentario, poderán incrementalos nunha taxa de variación interanual que non supere aquela que se identifique para efectos da aplicación da regra de gasto definida no artigo 12 da Lei orgánica 2/2012, do 27 de abril, de estabilidade orzamentaria e sustentabilidade financeira. As medidas previstas neste punto serán adicionais ás que lles resulten de aplicación, con carácter xeral, a todas as entidades locais.

b) Financiar integramente o custo dos servizos públicos mediante a aplicación de taxas e prezos públicos, de acordo cos seguintes límites mínimos:

1.º No primeiro exercicio orzamentario de aplicación das medidas, as taxas e os prezos públicos deberán financiar, como mínimo, o 50 por cento do custo do servizo público correspondente.

2.º No segundo exercicio orzamentario de aplicación das medidas deberán financiar, como mínimo, o 75 por cento do custo do servizo público correspondente.

3.º No terceiro exercicio orzamentario de aplicación das medidas deberán financiar a totalidade do custo do servizo público correspondente.

c) As ordenanzas fiscais que resulten de aplicación deberán cumprir os seguintes requisitos:

1.º Non poderán suprimir ningún dos tributos que veña exixindo a entidade local durante o exercicio 2013.

2.º Só poderán aprobar medidas que determinen un incremento do importe global das cotas de cada tributo local, sen prexuízo do establecido no ordinal 5.º desta alínea.

3.º Só poderán recoñecer os beneficios fiscais establecidos con carácter obrigatorio polas leis estatais, e os que estean vixentes en 2013 dos previstos nos artigos 9.1, relativo á domiciliación de débedas, anticipación de pagamentos ou colaboración na recadación, 62.3, 62.4, 74.1, 74.2 bis, 74.4, 88.2.d), 95.6.c), 103.2.d) e 103.2.e) do texto refundido da Lei reguladora das facendas locais.

4.º Non poderán aplicar os tipos de gravame reducidos a que se refire o punto 5 do artigo 72 do texto refundido da Lei reguladora das facendas locais.

5.º Deberanse aprobar, para cada ano en que resulten de aplicación estas medidas, tipos de gravame no imposto sobre bens inmobles que garantan, polo menos, o mantemento do importe global da cota íntegra do exercicio anterior.

d) A partir da data de presentación da solicitude do municipio de aplicación dalgunha das medidas previstas neste título II do real decreto lei e durante a vixencia das medidas que lle resulten de aplicación, os municipios, directa ou indirectamente, non poderán adquirir, constituír ou participar na constitución de novos organismos, sociedades, consorcios, fundacións ou calquera outro ente ou entidade.

e) No caso de que non se aproben os orzamentos, consideraranse prorrogados os do exercicio inmediato anterior conforme o disposto no artigo 169.6 do texto refundido da Lei reguladora das facendas locais, aprobado polo Real decreto lexislativo 2/2004, do 5 de marzo. Deberanse incluír os efectos das medidas contidas neste título II do real decreto lei que lle resulten aplicables ao municipio.

f) Só poderán ser obxecto de prórroga os orzamentos do exercicio orzamentario inmediato anterior.

g) No caso de que, existindo previamente un orzamento prorrogado, o pleno da corporación local non aprobe o orzamento do exercicio inmediato seguinte, deberá remitirse este á xunta de goberno local, que terá a competencia para a súa aprobación. O orzamento así aprobado será obxecto de publicación de acordo coas normas xerais e darase conta del ao pleno na primeira sesión que teña lugar con posterioridade á dita aprobación.

h) Deberán ser informados o Ministerio de Facenda e Administracións Públicas e o pleno do concello do resultado da aplicación dos criterios determinantes dos dereitos de difícil ou imposible recadación, cos seguintes límites mínimos:

1.º Os dereitos pendentes de cobramento liquidados dentro dos orzamentos dos dous exercicios anteriores a aquel a que lle corresponda a liquidación minoraranse, como mínimo, nun 25 por cento.

2.º Os dereitos pendentes de cobramento liquidados dentro dos orzamentos do exercicio terceiro anterior a aquel a que lle corresponda a liquidación minoraranse, como mínimo, nun 50 por cento.

3.º Os dereitos pendentes de cobramento liquidados dentro dos orzamentos dos exercicios cuarto a quinto anteriores a aquel a que lle corresponda a liquidación minoraranse, como mínimo, nun 75 por cento.

4.º Os dereitos pendentes de cobramento liquidados dentro dos orzamentos dos restantes exercicios anteriores a aquel a que lle corresponda a liquidación minoraranse nun 100 por cento.

i) Deberán incluír na memoria que acompañe os seus orzamentos unha xustificación expresa de ter elaborado e aprobado os seus orzamentos:

1.º Cunha estimación de ingresos de carácter ordinario consistentes na recadación e a realización de dereitos nos dous exercicios anteriores.

2.º Cunha estimación de ingresos de carácter extraordinario que estea suficientemente fundada, sen que se poida facer valer para estes efectos a simple expectativa de obtención de recursos.

j) Os municipios que presenten un volume de débeda que poida ser obxecto de compensación mediante retencións na participación en tributos do Estado e que sexa superior aos seus ingresos non financeiros, deducidos da liquidación de orzamentos do exercicio de 2012, así como os concellos que concerten operacións de crédito para financiar o remanente de tesouraría negativo para gastos xerais, deberán someter a informe previo e vinculante do Ministerio de Facenda e Administracións Públicas a aprobación dos orzamentos municipais.

k) As operacións de endebedamento que se subscriban no marco deste título II do real decreto lei non poderán ser outorgadas nin avaladas por entidades de dereito público do sector público estatal.

l) Con anterioridade ao 31 de decembro de 2013, deberán solicitar á Dirección Xeral do Catastro a súa inclusión con carácter prioritario na regularización catastral prevista na disposición adicional terceira do texto refundido da Lei do catastro inmobiliario. Para tal efecto, deberánlle xuntar á solicitude canta información dispoñan sobre os bens inmobles ou as alteracións das súas características non incorporadas ao Catastro inmobiliario.

Artigo 27. Condicións aplicables con carácter xeral ás entidades vinculadas ou dependentes dos municipios.

1. As entidades que, no momento da entrada en vigor deste real decreto lei, desenvolvan actividades económicas, estean adscritas para efectos do Sistema Europeo de Contas aos municipios aos cales se lles aplique calquera das medidas contidas nesta norma e se encontren en desequilibrio financeiro disporán do prazo de dous meses, contados desde que o municipio resulte beneficiario dalgunha das medidas, para aprobar, logo de informe do órgano interventor do municipio, un plan de corrección do dito desequilibrio.

Se as medidas de corrección non se adoptan antes do 31 de xaneiro de 2014 ou se, adoptadas, non se producise a corrección acordada en decembro de 2014, o municipio, no prazo máximo dos seis meses seguintes contados desde a aprobación das contas anuais ou da liquidación do orzamento do exercicio 2014 da entidade, segundo proceda, disolverá cada unha das entidades que continúe en situación de desequilibrio. De non o facer, as ditas entidades quedarán automaticamente disoltas o 1 de agosto de 2015.

Esta situación de desequilibrio financeiro referirase, para os entes que teñan a consideración de Administración pública para efectos do Sistema Europeo de Contas, á súa necesidade de financiamento en termos do dito sistema, mentres que para os demais entes se entenderá como a situación de desequilibrio financeiro manifestada na existencia de perdas en dous exercicios contables consecutivos.

2. Aqueles organismos, entidades, sociedades, consorcios, fundacións, unidades e demais entes que, no momento da entrada en vigor deste real decreto lei, estean controlados exclusivamente por unidades adscritas, vinculadas ou dependentes, para efectos do Sistema Europeo de Contas, a calquera dos municipios aos cales se lles aplique calquera das medidas contidas nesta norma, deberán ser disoltos no prazo de tres meses desde a aprobación polo Ministerio de Facenda e Administracións Públicas das medidas que resulten de aplicación. Adicionalmente, deberán iniciar o proceso de liquidación no prazo de tres meses contados desde a data de disolución. De non o facer, as ditas entidades quedarán automaticamente disoltas o 1 de xullo de 2014.

No caso de que aquel control non se exerza con carácter exclusivo, as citadas unidades dependentes deberán proceder á transmisión da súa participación no prazo de tres meses desde a aprobación polo Ministerio de Facenda e Administracións Públicas das medidas que resulten de aplicación.

Artigo 28. Condicións adicionais por aplicación das medidas de apoio no ámbito da participación en tributos do Estado, en relación coas débedas dos municipios con acredores públicos o co réxime de endebedamento.

Os municipios que resulten beneficiarios das medidas de apoio no ámbito da participación en tributos do Estado previstas no artigo 22.a e tamén resulten beneficiarios das medidas relacionadas coas débedas dos municipios con acredores públicos previstas no artigo 23 ou das medidas relacionadas co réxime de endebedamento recollidas no artigo 24 ou das medidas relativas ao financiamento do remanente negativo de tesouraría recollidas no artigo 25, ademais de cumprir coas condicións dos artigos 26 e 27 deberán cumprir, durante o período en que se apliquen estas medidas, coas seguintes condicións adicionais:

a. Os importes que resulten da aplicación das medidas mencionadas neste artigo deberán ingresarse nunha conta bancaria de titularidade do municipio de uso restrinxido que deberá ser autorizada, por proposta do municipio, pola Secretaría Xeral de Coordinación Autonómica e Local do Ministerio de Facenda e Administracións Públicas. Esta autorización será individualizada e determinará, entre outras cuestións, as condicións de utilización da dita conta, especificará os pagamentos que se efectuarán con cargo a esta e disporá as obrigas de información e control da entidade de crédito.

A Secretaría Xeral de Coordinación Autonómica e Local terá acceso á mencionada conta bancaria e, por causa xustificada e logo de comunicación ao municipio, poderá ordenar o seu bloqueo.

Tanto as entidades de crédito, cando o Ministerio de Facenda e Administracións llelo solicite, como a tesouraría do municipio, trimestralmente, remitirán ao Ministerio de Facenda e Administracións Públicas o detalle dos movementos producidos na conta bancaria citada.

b. A liquidez obtida en aplicación das medidas mencionadas neste artigo deberase destinar a minorar o importe das obrigas pendentes de pagamento correspondentes aos exercicios orzamentarios corrente e pechado, así como a atender os seus vencementos de operacións de crédito que concertase no marco da aplicación das medidas previstas neste título II e que deberán ser comunicadas pola entidade local ao Ministerio de Facenda e Administracións Públicas.

Artigo 29. Condicións adicionais por aplicación das medidas de apoio no ámbito da participación en tributos do Estado.

Os municipios que resulten beneficiarios das medidas de apoio no ámbito da participación en tributos do Estado recollidas no artigo 22, ademais de cumpriren coas condicións previstas nos artigos 26, 27 e 28, non poderán incrementar a súa débeda cos acredores públicos, salvo que veña determinado por unha lei, en ningún caso poderán incrementar a súa débeda en período executivo e deberán atender as obrigas correntes que se devindiquen a partir do mes seguinte á aplicación das medidas previstas no artigo 22.

Artigo 30. Condicións adicionais por aplicación das medidas relativas ás débedas cos acredores públicos.

1. O municipio que resulte beneficiario das medidas relativas ás súas débedas con acredores públicos previstas no artigo 23, ademais de cumprir coas condicións previstas nos artigos 26, 27 e 28, deberá cumprir, durante o período en que se apliquen estas medidas, as seguintes condicións adicionais:

a. Non poderá incrementar a súa débeda cos acredores públicos, salvo que veña determinado por unha lei. En ningún caso poderá incrementar a súa débeda en período executivo e deberá atender as obrigas correntes que se devindiquen a partir do mes seguinte á aplicación das medidas previstas no artigo 23.

b. As ordenanzas fiscais que resulten de aplicación deberán establecer e exixir os impostos a que se refire o artigo 59.2 do texto refundido da Lei reguladora das facendas locais.

c. As ordenanzas fiscais deberán establecer para cada imposto local o tipo de gravame máximo permitido no dito texto refundido, sen prexuízo do disposto na alínea e. deste punto.

d. Aplicaráselles de oficio os coeficientes previstos no número 2 do artigo 32 do texto refundido da Lei do catastro inmobiliario, cando se trate de municipios que fosen obxecto dun procedemento de valoración colectiva de carácter xeral para os bens inmobles urbanos como consecuencia dun cadro de valores total aprobado con anterioridade ao ano 2003.

e. Deberán aprobar nas correspondentes ordenanzas fiscais un tipo de gravame do imposto sobre bens inmobles, para os bens inmobles urbanos, que sexa superior, como mínimo, nun 25 por 100, ao determinado de conformidade co artigo 72 do texto refundido da Lei reguladora das facendas locais para o exercicio 2013. Non obstante, o tipo aplicable non poderá ser superior en ningún caso ao máximo previsto nese artigo nin inferior ao 0,6 por 100.

f. Deberán establecer para o imposto sobre vehículos de tracción mecánica o coeficiente máximo permitido polo artigo 95.4 do texto refundido da Lei reguladora das facendas locais.

2. En caso de incumprimento das obrigas correntes cos acredores públicos a partir da aplicación das medidas previstas no artigo 23, anularase a aplicación da medida de fraccionamento que se lle concedese.

Artigo 31. *Condicións adicionais para a aplicación de medidas relativas ao réxime de endebedamento.*

O municipio que resulte beneficiario das medidas relativas ao réxime de endebedamento previstas no artigo 24, ademais de cumprir coas condicións previstas nos artigos 26, 27 e 28, non poderá concertar novas operacións de endebedamento a longo prazo durante o período de amortización das operacións financeiras a longo prazo que resulten da consolidación regulada neste título II do real decreto lei.

CAPÍTULO IV

Normas procedementais e actuacións de seguimento e control

Artigo 32. *Procedemento.*

1. No prazo dun mes desde a entrada en vigor deste real decreto lei, o Ministerio de Facenda e Administracións Públicas, mediante resolución da Secretaría Xeral de Coordinación Autonómica e Local do Ministerio de Facenda e Administracións Públicas, publicará a relación de municipios que poderán solicitar, por unha soa vez, a aplicación das medidas contidas no título II do real decreto lei.

2. No prazo dos dous meses seguintes, contados desde a publicación da resolución mencionada no punto anterior, o municipio, a través do interventor por medios telemáticos e con sinatura electrónica, poderá solicitar ao Ministerio de Facenda e Administracións Públicas acollerse a algunha ou varias das medidas previstas neste título II do real decreto lei. A mencionada solicitude irá acompañada dun plan de axuste, ou modificación do que teñan, dos correspondentes acordos do Pleno da Corporación Local, nos cales se deberá incluír a aceptación das medidas que acorde o Ministerio de Facenda e Administracións Públicas, así como das condicións contidas neste título II do real decreto lei e daquelas outras condicións que aquel ministerio considere necesarias para o saneamento financeiro do municipio.

3. No prazo de dous meses desde a presentación da solicitude, a Secretaría Xeral de Coordinación Autonómica e Local do Ministerio de Facenda e Administracións Públicas ditará resolución e, de ser o caso, concretará as medidas que resultarán de aplicación e a forma de cumprimento das condicións establecidas nesta norma. Respecto da medida do artigo 23, requirirá previamente resolución favorable do órgano competente. A citada resolución determinará, de ser o caso, para cada entidade local o importe e os prazos concretos dos anticipos recollidos no artigo 22.a) deste real decreto lei dentro dos límites máximos establecidos nel, tendo en conta a capacidade da entidade local para o seu reintegro nos prazos acordados, a avaliación da revisión do plan de axuste, a evolución previsible das entregas á conta e as retencións practicadas por outros conceptos sobre elas durante o período de aplicación da medida.

4. No caso de que a entidade local teña un plan de axuste valorado favorablemente polo Ministerio de Facenda e Administracións Públicas, como consecuencia do mecanismo de pagamento a provedores, terase en conta o seu grao de cumprimento para determinar o contido da resolución a que se refire o punto anterior.

5. Se na resolución a que se refire o punto anterior non se recollen todas as medidas solicitadas polo municipio, este, mediante acordo do seu pleno, deberá aprobar unha revisión do plan de axuste, de modo que teña en conta o contido da resolución. No prazo dun mes desde a recepción da resolución, o municipio deberá remitir ao Ministerio de Facenda e Administracións Públicas a mencionada revisión.

Artigo 33. *Actuacións de control.*

1. O Ministerio de Facenda e Administracións Públicas realizará o seguimento e o control das medidas e condicións contidas neste título II.

Para tales efectos, o municipio enviará e permitirá o acceso a toda a información que o mencionado ministerio xulgue relevante na materia e que en todo caso incluíra, polo menos, información sobre a xestión mensual da tesouraría municipal.

2. Cando se aprecie incumprimento ou risco de incumprimento dos compromisos asumidos pola corporación local no marco deste título II, o Ministerio de Facenda e Administracións Públicas requiriralle que corrixa o incumprimento ou risco de incumprimento e indicará as medidas para adoptar que se consideren necesarias e que serán de obrigado cumprimento para aquela como parte do seu plan de axuste.

Artigo 34. *Incumprimentos.*

O incumprimento polo municipio dos compromisos asumidos, sen que tampouco se tivese atendido o requirimento formulado polo Ministerio de Facenda e Administracións Públicas, dará lugar á anulación das medidas de apoio contidas nesta norma, sen prexuízo da aplicación das medidas previstas na disposición adicional primeira da Lei orgánica 2/2012, do 27 de abril, de estabilidade orzamentaria e sustentabilidade financeira.

Para a anulación da medida do artigo 23, requirírase previamente resolución do órgano competente.

Disposición derradeira primeira. *Habilitación normativa.*

Habilítanse o Goberno e o ministro de Facenda e Administracións Públicas, no ámbito das súas competencias, para ditaren as disposicións e adoptaren as medidas necesarias para o desenvolvemento e a execución do disposto neste real decreto lei.

Disposición derradeira segunda. *Dereito supletorio.*

No non previsto no título I deste real decreto lei observárase o disposto no Real decreto lei 4/2012, do 24 de febreiro, polo que se determinan as obrigas de información e os procedementos necesarios para establecer un mecanismo de financiamento para o pagamento aos provedores das entidades locais; no Real decreto lei 7/2012, do 9 de marzo, polo que se crea o Fondo para o Financiamento dos Pagamentos a Provedores; no Real decreto lei 4/2013, do 22 de febreiro, de medidas de apoio ao emprendedor e de estímulo do crecemento e da creación de emprego, así como no Acordo do Consello de Política Fiscal e Financeira do 6 de marzo de 2012, polo que se fixan as liñas xerais dun mecanismo extraordinario de financiamento para o pagamento aos provedores das comunidades autónomas.

Disposición derradeira terceira. *Modificación dos orzamentos de explotación e capital do Fondo para o Financiamento dos Pagamentos a Provedores.*

Como consecuencia do incremento neto máximo das débedas financeiras a curto e longo prazo por importe de 8.200.000 miles de euros do Fondo para o Financiamento dos Pagamentos a Provedores, apróbanse as modificacións dos orzamentos de explotación e capital do Fondo para o Financiamento dos Pagamentos a Provedores nos termos previstos no anexo deste real decreto lei.

Disposición derradeira cuarta. *Modificación do anexo III da Lei 17/2012, do 27 de decembro, de orzamentos xerais do Estado para o ano 2013.*

Engádesse no anexo III da Lei 17/2012, do 27 de decembro, de orzamentos xerais do Estado para o ano 2013, o Fondo para o Financiamento dos Pagamentos a Provedores

por un importe de 8.200.000 miles de euros. Esta cifra entenderase como incremento neto máximo das débedas financeiras a curto e longo prazo entre o 1 de xaneiro e o 31 de decembro de 2013.

Disposición derradeira quinta. *Modificación do texto refundido da Lei de contratos do sector público aprobado polo Real decreto legislativo 3/2011, do 14 de novembro.*

O texto refundido da Lei de contratos do sector público, aprobado polo Real decreto legislativo 3/2011, do 14 de novembro, modifícase nos seguintes termos:

Un. O punto 3 do artigo 316 queda redactado do seguinte modo:

«3. Correspóndenlle ao Ministerio de Facenda e Administracións Públicas, a través do órgano que se determine na súa estrutura orgánica, as funcións de órgano de contratación do sistema estatal de contratación centralizada regulado nos artigos 206 e 207.»

Dous. Queda sen efecto o artigo 322.

Tres. Inclúese unha nova disposición adicional trixésimo cuarta coa seguinte redacción:

«Disposición adicional trixésimo cuarta. *Referencias a órganos competentes en materia de contratación centralizada.*

Todas as referencias efectuadas á Dirección Xeral do Patrimonio do Estado en materia de contratación centralizada contidas no ordenamento xurídico, e en particular nesta lei e na súa normativa de desenvolvemento, se entenderán feitas ao órgano competente do Ministerio de Facenda e Administracións Públicas que se determine no correspondente real decreto de desenvolvemento da estrutura orgánica básica do dito ministerio. Este órgano asumirá, desde a súa constitución, as competencias da Dirección Xeral de Patrimonio do Estado en materia de contratación centralizada.»

Catro. Inclúese unha nova disposición transitoria novena coa seguinte redacción:

«Disposición transitoria novena. *Mesa de contratación do sistema estatal de contratación centralizada.*

A Dirección Xeral de Patrimonio do Estado actuará como órgano de contratación centralizada mentres non se lle atribúan, conforme o artigo 316.3, a un órgano distinto as funcións de órgano de contratación do sistema estatal de contratación centralizada, e contará, ata ese momento, coa asistencia da mesa de contratación do sistema estatal de contratación centralizada.»

Disposición derradeira sexta. *Entrada en vigor.*

Este real decreto lei entrará en vigor o día seguinte ao da súa publicación no «Boletín Oficial del Estado».

Dado en Madrid o 28 de xuño de 2013.

JUAN CARLOS R.

A presidenta do Goberno en funcións,
SORAYA SÁENZ DE SANTAMARÍA ANTÓN

ANEXO

Orzamento de explotación modificado do Fondo para o Financiamento dos Pagamentos a Provedores

As partidas afectadas quedan substituídas polos seguintes importes:

	Importe en miles de euros
1. IMPORTE NETO DA CIFRA DE NEGOCIOS	1.635.056
7. OUTROS GASTOS DE EXPLOTACIÓN	-99.187
a) Servizos exteriores	-98.951
A-1) RESULTADO DE EXPLOTACIÓN (1+2+3+4+5+6+7+8+9+10+11+12+13+14+15+16)	1.534.188
17. INGRESOS FINANCIEROS	0
b) De valores negociables e doutros instrumentos financeiros	0
b2) De terceiros	0
18. GASTOS FINANCIEROS	-1.556.386
b) Por débedas con terceiros	-1.556.386
A.2) RESULTADO FINANCIERO (17+18+19+20+21+22+23)	-1.556.386
A.3) RESULTADO ANTES DE IMPOSTOS (A.1+A.2+24+25+26)	-22.198
A.4) RESULTADO DO EXERCICIO PROCEDENTE DE OPERACIÓNS CONTINUADAS (A.3+27)	-22.198
A.5) RESULTADO DO EXERCICIO (A.4+28) (29+A.6)	-22.198
A.6) RESULTADO DA ENTIDADE/RESULTADO ATRIBUÍDO Á ENTIDADE DOMINANTE	-22.198

Orzamento de capital modificado do Fondo para o Financiamento dos Pagamentos a Provedores

As partidas afectadas quedan substituídas polos seguintes importes:

	Importe en miles de euros
1. RESULTADO DO EXERCICIO ANTES DE IMPOSTOS	-22.198
2. AXUSTES DO RESULTADO	1.556.386
a) Gastos financeiros (+)	1.556.386
4. OUTROS FLUXOS DE EFECTIVO DAS ACTIVIDADES DE EXPLOTACIÓN	-1.556.386
a) Pagamentos de xuros (-)	-1.556.386
5. FLUXOS DE EFECTIVO DAS ACTIVIDADES DE EXPLOTACIÓN (+/-1+/-2+/-3+/-4)	-22.198
6. PAGAMENTOS POR INVESTIMENTOS (-)	-8.200.000
e) Outros activos financeiros	-8.200.000
8. FLUXOS DE EFECTIVO DAS ACTIVIDADES DE INVESTIMENTO (7-6)	-8.200.000
10. COBRAMENTOS E PAGAMENTOS POR INSTRUMENTOS DE PASIVO FINANCIERO	8.200.000
a) Emisión	8.200.000
2. Débedas con entidades de crédito (+)	8.200.000
12. FLUXOS DE EFECTIVO DAS ACTIVIDADES DE FINANCIAMENTO (+/-9+/-10-11)	8.200.000
EFFECTIVO OU EQUIVALENTES AO INCIO DO EXERCICIO	425.353
E) AUMENTO/DIMINUCCIÓN NETA DO EFECTIVO OU EQUIVALENTES (+/-5+/-8+/-12 +/-D)	-22.198
EFFECTIVO OU EQUIVALENTES AO FINAL DO EXERCICIO	403.155

ORZAMENTOS XERAIS DO ESTADO
ANO 2013

Entidade: FONDO PARA O FINANCIAMENTO DOS PAGAMENTOS A PROVEDORES	
(miles de euros)	
ORZAMENTO DE EXPLOTACIÓN: "CONTA DE PERDAS E GANANCIAS"	
A) OPERACIÓNS CONTINUADAS	
1. IMPORTE NETO DA CIFRA DE NEGOCIOS	
a) Ventas:	1.635.056
b) Prestacións de servizo:	1.635.056
2. VARIACIÓN DE EXISTENCIAS DE PRODUTOS REMATADOS E EN CURSO DE FABRICACIÓN	
3. TRABALLOS REALIZADOS POLA EMPRESA PARA O SEU ACTIVO	
4. APROVISIONAMENTOS:	
a) Consumo de mercadorías	
b) Consumo de materias primas e doutras materias consumibles	
c) Traballos realizados por outras empresas	
d) Deterioración de mercadorías, materias primas e outros aprovisionamentos	
5. OUTROS INGRESOS DE EXPLOTACIÓN	
a) Ingresos accesorios e outros de xestión corrente	
b) Subvencións de explotación incorporadas ao resultado do exercicio	
- Da Administración xeral do Estado	
- Dos organismos autónomos da Administración xeral do Estado	
- Doutras do sector público estatal de carácter administrativo	
- Do sector público estatal de carácter empresarial e fundacional	
- Da Unión Europea	
- Doutras	
c) Imputación de subvencións de explotación	
6. GASTOS DE PERSOAL	-1.681
a) Soldos e salarios	-1.454
b) Indemnizacións	
c) Seguridade Social por conta da empresa	-227
d) Outros	
7. OUTROS GASTOS DE EXPLOTACIÓN	-99.187
a) Servizos exteriores	-98.951
b) Tributos	
c) Perda, deterioración e variación de provisións por operacións comerciais	
d) Outros gastos de xestión corrente	-236
8. AMORTIZACIÓN DO INMOBILIZADO	

ORZAMENTOS XERAIS DO ESTADO
ANO 2013

Entidade: FONDO PARA O FINANCIAMENTO DOS PAGAMENTOS A PROVEDORES	
(miles de euros)	
ORZAMENTO DE EXPLOTACIÓN: "CONTA DE PERDAS E GANANCIAS"	
9. IMPUTACIÓN DE SUBVENCÍONS DE INMOBILIZADO NON FINANCEIRO E OUTRAS	
10. EXCESO DE PROVISÍONS	
11. DETERIORACIÓN E RESULTADO POR ALLEAMENTOS DO INMOBILIZADO	
a) Deterioracións e perdas	
b) Resultados por alleamentos e outras	
12. DIFERENZA NEGATIVA DE COMBINACÍONS DE NEGOCIOS	
13. SUBVENCÍONS CONCEDIDAS E TRANSFERENCIAS REALIZADAS POLA ENTIDADE	
-Ao sector público estatal de carácter administrativo	
-Ao sector público estatal de carácter empresarial ou fundacional	
-A outros	
14. OUTROS RESULTADOS	
15. DETERIORACIÓN E RESULTADO POR ALLEAMENTOS DE PARTICIPACÍONS CONSOLIDADAS	
16. DIFERENZA NEGATIVA DE CONSOLIDACIÓN DE SOCIEDADES CONSOLIDADAS	
A 1) RESULTADO DE EXPLOTACIÓN (1+2+3+4+5+6+7+8+9+10+11+12+13+14+15+16)	1.534.188
17. INGRESOS FINANCEIROS	
a) De participación en instrumentos de patrimonio	
a1) En empresas do grupo asociadas	
a2) En terceiros	
b) De valores negociables e doutros instrumentos financeiros	
b1) De empresas do grupo e asociadas	
b2) De terceiros	
18. GASTOS FINANCEIROS	-1.556.386
a) Por débedas con empresas do grupo e asociadas	
b) Por débedas con terceiros	-1.556.386
c) Por actualización de provisións	
19. VARIACIÓN DE VALOR RAZOABLE EN INSTRUMENTOS FINANCEIROS	
a) Carteira de negocios e outros	
b) Imputación ao resultado do exercicio por activos financeiros dispoñibles para a venda	

ORZAMENTOS XERAIS DO ESTADO
ANO 2013

Entidade: FONDO PARA O FINANCIAMENTO DOS PAGAMENTOS A PROVEDORES	
(miles de euros)	
ORZAMENTO DE EXPLOTACIÓN: "CONTA DE PERDAS E GANANCIAS"	
20. DIFERENZAS DE CAMBIO	
21. DETERIORACIÓN E RESULTADOS POR ALLEAMENTOS DE INSTRUMENTOS FINANCEIROS	
a) Deterioración e perdas	
b) Resultado por alleamentos e outras	
22. IMPUTACIÓN DE SUBVENCIÓNS, DOAZÓNS E LEGADOS DE CARÁCTER FINANCEIRO	
23. INCORPORACIÓN AO ACTIVO DE GASTOS FINANCEIROS	
A 2) RESULTADO FINANCEIRO (17+18+19+20+21+22+23)	-1.556.386
24. PARTICIPACIÓN EN BENEFICIOS (PERDAS) DE SOCIEDADES POSTAS EN EQUIVALENCIA	
25. DETERIORACIÓN E RESULTADOS POR ALLEAMENTOS DE PARTICIPACIÓNS POSTAS EN EQUIVALENCIA	
26. DIFERENZA NEGATIVA DE CONSOLIDACIÓN DE SOCIEDADES POSTAS EN EQUIVALENCIA	
A 3) RESULTADO ANTES DE IMPOSTOS (A1+A2+24+25+26)	-22.198
27. IMPOSTOS SOBRE BENEFICIOS	
A 4) RESULTADO DO EXERCICIO PROCEDENTE DE OPERACIÓNS CONTINUADAS (A3+27)	-22.198
B) OPERACIÓNS INTERROMPIDAS	
28. RESULTADO DO EXERCICIO PROCEDENTE DE OPERACIÓNS INTERROMPIDAS NETO DE IMPOSTOS	
A5) RESULTADO DO EXERCICIO (A4+28) (29+A6)	-22.198
29. RESULTADO ATRIBUÍDO A SOCIOS EXTERNOS	
A6) RESULTADO DA ENTIDADE/RESULTADO ATRIBUÍDO Á ENTIDADE DOMINANTE	-22.198

ORZAMENTOS XERAIS DO ESTADO
ANO 2013

Entidade: FONDO PARA O FINANCIAMENTO DOS PAGAMENTOS A PROVEDORES	
	(miles de euros)
ORZAMENTO DE CAPITAL: "ESTADO DE FLUXOS DE EFECTIVO"	
A) FLUXOS DE EFECTIVO DAS ACTIVIDADES DE EXPLOTACIÓN	
1. RESULTADO DO EXERCICIO ANTES DE IMPOSTOS	-22.198
2. AXUSTES DO RESULTADO	1.556.386
a) Amortización do inmovilizado (-)	
b) Correccións valorativas por deterioración (+/-)	
c) Valoración de provisións (+/-)	
d) Imputación de subvencións (-)	
e) Resultados por baixas e alleamentos do inmovilizado (+/-)	
f) Resultados por baixas e alleamentos de instrumentos financeiros (+/-)	
g) Ingresos financeiros (-)	
h) Gastos financeiros (+)	1.556.386
i) Diferenzas de cambio (+/-)	
j) Variación de valor razoable en instrumentos financeiros (+/-)	
k) Outros ingresos e gastos (-/+)	
l) Participación en beneficios (perdas) de sociedades postas en equivalencia -neto de dividendos- (-/+)	
3. CAMBIOS NO CAPITAL CORRENTE	
a) Existencias (+/-)	
b) Debedores e outras contas a cobrar (+/-)	
c) Outros activos correntes (+/-)	
d) Acredores e outras contas a pagar (+/-)	
e) Outros pasivos correntes (+/-)	
f) Outros activos e pasivos non correntes (+/-)	
4. OUTROS FLUXOS DE EFECTIVO DAS ACTIVIDADES DE EXPLOTACIÓN	-1.556.386
a) Pagamentos de xuros (-)	-1.556.386
b) Cobramentos de dividendos (+)	
c) Cobramentos de xuros (+)	
d) Cobramentos (pagamentos) por imposto sobre beneficios (+/-)	
e) Outros pagamentos (cobramentos) (-/+)	
5. FLUXOS DE EFECTIVO DAS ACTIVIDADES DE EXPLOTACIÓN (+/-1+/-2+/-3+/-4)	-22.198

ORZAMENTOS XERAIS DO ESTADO
ANO 2013

Entidade: FONDO PARA O FINANCIAMENTO DOS PAGAMENTOS A PROVEDORES	
	(miles de euros)
ORZAMENTO DE CAPITAL: "ESTADO DE FLUXOS DE EFECTIVO"	
B) FLUXOS DE EFECTIVO DAS ACTIVIDADES DE INVESTIMENTO	
6. PAGAMENTOS POR INVESTIMENTOS (-)	-8.200.000
a) Empresas do grupo e asociadas	
b) Inmobiliado intanxible	
c) Inmobiliado material	
d) Investimentos inmobiliarios	
e) Outros activos financeiros	-8.200.000
f) Activos non correntes mantidos para a venda	
g) Outros activos	
h) Unidade de negocio	
7. COBRAMENTOS POR DESINVESTIMENTOS (+)	
a) Empresas do grupo e asociadas	
b) Inmobiliado intanxible	
c) Inmobiliado material	
d) Investimentos inmobiliarios	
e) Outros activos financeiros	
f) Activos non correntes mantidos para venda	
g) Outros activos	
h) Unidade de negocio	
8. FLUXOS DE EFECTIVO DAS ACTIVIDADES DE INVESTIMENTO (7-6)	-8.200.000
C) FLUXOS DE EFECTIVO DAS ACTIVIDADES DE FINANCIAMENTO	
9. COBRAMENTOS E PAGAMENTOS POR INSTRUMENTOS DE PATRIMONIO	
a) Emisión de instrumentos de patrimonio (+)	
-Da Administración xeral do Estado	
-Dos organismos autónomos da Administración xeral do Estado	
-Doutros do sector público estatal de carácter administrativo	
-Do sector público estatal de carácter empresarial ou fundacional	
-Doutros	
b) Amortización de instrumentos de patrimonio (-)	
c) Adquisición de instrumentos de patrimonio propio e da sociedade dominante (-)	
d) Alleamento de instrumentos de patrimonio propio e da sociedade dominante (+)	
e) Subvencións, doazóns e legados recibidos (+)	
-Da Administración xeral do Estado	
-Dos organismos autónomos da Administración xeral do Estado	

ORZAMENTOS XERAIS DO ESTADO
ANO 2013

Entidade: FONDO PARA O FINANCIAMENTO DOS PAGAMENTOS A PROVEDORES	
	(miles de euros)
ORZAMENTO DE CAPITAL: "ESTADO DE FLUXOS DE EFECTIVO"	
<ul style="list-style-type: none"> -Doutros do sector público estatal de carácter administrativo -Do sector público estatal de carácter empresarial ou fundacional -Da Unión Europea -Doutros f) Outras achegas de socios (+) <ul style="list-style-type: none"> -Da Administración xeral do Estado -Dos organismos autónomos da Administración xeral do Estado -Doutros do sector público estatal de carácter administrativo -Do sector público estatal de carácter empresarial ou fundacional -Da Unión Europea -Doutros g) Adquisición de participacións de socios externos (-) h) Venda de participacións a socios externos (+) 	
10. COBRAMENTOS E PAGAMENTOS POR INSTRUMENTOS DE PASIVO FINANCEIRO	8.200.000
a) Emisión	8.200.000
1. Obrigas e outros valores negociables (+)	
2. Débedas con entidades de crédito (+)	8.200.000
3. Débedas con empresas do grupo e asociadas (+)	
4. Débedas transformables en subvencións, doazóns e legados (+)	
-Da Administración xeral do Estado	
-Dos organismos autónomos da Administración xeral do Estado	
-Doutros do sector público estatal de carácter administrativo	
-Do sector público estatal de carácter empresarial ou fundacional	
-Doutros	
5. Préstamos procedentes do sector público (+)	
-Da Administración xeral do Estado	
-Dos organismos autónomos da Administración xeral do Estado	
-Doutros do sector público estatal de carácter administrativo	
-Do sector público estatal de carácter empresarial ou fundacional	
-Doutros	
6. Outras débedas (+)	
b) Devolución e amortización de:	
1. Obrigas e outros valores negociables (-)	
2. Débedas con entidades de crédito (-)	
3. Débedas con empresas do grupo e asociadas (-)	
4. Outras débedas (-)	

ORZAMENTOS XERAIS DO ESTADO
ANO 2013

Entidade: FONDO PARA O FINANCIAMENTO DOS PAGAMENTOS A PROVEDORES	
	(miles de euros)
ORZAMENTO DE CAPITAL: "ESTADO DE FLUXOS DE EFECTIVO"	
11. PAGAMENTOS POR DIVIDENDOS E REMUNERACIÓNS DOUTROS INSTRUMENTOS DE PATRIMONIO	
a) Dividendos (-)	
-Á Administración xeral do Estado	
-A organismos autónomos da Administración xeral do Estado	
-A outros do sector público estatal de carácter administrativo	
-Ao sector público estatal de carácter empresarial ou fundacional	
-A outros	
b) Remuneración doutros instrumentos de patrimonio (-)	
12. FLUXOS DE EFECTIVO DAS ACTIVIDADES DE FINANCIAMENTO (+/-9+/-10-11)	8.200.000
D) EFECTO DAS VARIACIÓNS DOS TIPOS DE CAMBIO	
E) AUMENTO/DIMINUCIÓN NETA DO EFECTIVO OU EQUIVALENTES (+/-5+/-8+/-12+/-D)	-22.198
EFFECTIVO OU EQUIVALENTES AO COMEZO DO EXERCICIO	425.353
EFFECTIVO OU EQUIVALENTES AO FINAL DO EXERCICIO	403.155